


昭代風謠

乾

^ 18
2445
1



18
2445
卷

題昭代風謠卷首

樂樓齋

羅

我朝右文爲治學士大夫類以詩書翰墨蔚爲國華
固亡論已其跡寄閭井卑陬不得犯而上之者亦頗
各鳴其藝風調自佳如斯集所列却不可少是豈容
以人地盡廢之耶余益信天不愛才爲之則是患不
力耳爲則下者上不爲則上者下理勢然也余於是
不堪撫卷一慨

陶谷樵叟李宜顯草

風之行於天下假人以鳴曰謠其鳴也以天故人之
性情代之汚隆如鏡焉一以人而雜之則其天汨矣
又何以鏡焉然風之行於天下變遷不常周之時風
自岐鎬江漢之間漢唐之風萃於汧渭伊洛汴宋之
南也其風亦南吳楚閩越彬彬焉 明興勃碣之人
揚聲擗藻秀甲於天下豈非王者之都必占天地風
氣之所聚而人物之濡染觀感又非四方所可比也
然周之風皆出於民俗故其天全漢以後多出於士
大夫故其天不全余讀漢魏詩如十九首及其他古
樂府無名氏諸篇犁然有國風言外之旨雖以子建

風骨邈然不能及况餘子乎余意其出於閭巷謳謠之自然者方叶於風詩而一涉思索則失之矣我東方與燕都同箕尾之分世所謂雲漢末派明風之自勃碣也東方固已首被矣今天下皆已侏離勃碣之風渡江以遷亭毒煽鼓於一區文物之邦而又求其風之所翕則漢京是已夫以華山漢水秀美冲和之氣開闢以來蟠際盼蠻不一泄以啓昭代之文化而又爲箕尾雲漢之所窮措紳士不能獨當而委巷圭竇往往鍾靈焉且後世士大夫措措然用力於舉業尤不能全其天外乎此者不過遐荒山澤方外

孤絕之語漠然與王化不相關又烏足以爲風乎惟我國閭井之人限於國制科舉無所累其心生於京華又無方外孤絕之病得以遊聞詩社歌詠文化大者能追步古作者蔚然爲家數小者亦能嫋娜成腔調要之乎全其天性發之天機咨嗟咏歎不能自己者實岐鎬江漢之遺也有人手昭代風謠眎余求弁卷之文大抵不出於都下里巷之作而希菴蔡公所裒選李達峰繼而刪正者也噫自夫陳觀採貢之法廢而風謠之絕於世久矣於今始見之此乃王化之端也烏可以出於闌闐而忽之乎天下之風

自江漢而伊洛自伊洛而江左自江左而燕碣自燕碣而爲東方之漢京漢京者卽馬韓百濟據險躍馬之地其俗椎武其風叱咤夫孰知丕變於昭代而爲此文雅之俗歌謠之盛乎風無定聲民無定情一與教化推移二南以後無復二南之風者吾不信也一日國家陳詩以觀民風赫然思復二南之隆則採之必自茲編始其所關夫豈淺尠也哉書此以備樂官之考焉

歲丁巳仲春藥山吳光運序

情性之賦於天貴賤一也其發於情性而爲詩者夫豈有間哉詩本於三百篇吾夫子採之者類多閭巷匹庶謳謠之言不但郊廟朝廷樂歌之詞而已其不以生地取舍之者可知已今諸家所作宣導陶寫舉有平淡閒遠之意徃徃怆慨結轡寓不遇之感哀而不傷要不失風雅本旨若有太史氏陳詩如古之觀風雖編之於中林兔置之後可也

歲丁巳暮春上澣通政大夫吏曹參議知製教曹命教題

文以代選不以人貴賤芣苢小星之詩列於葛覃卷
耳之後權夫之歌蔡女之拍繫於屈騷賈賦之下夫
子之刪詩晦翁之正楚辭其義一也今茲書不取摺
紳大夫之作而只采委巷風謠合爲一秩此其意何
也噫古之陳風採謠自閭巷始外可以推內末可以
知本以閭巷而朝廷卿士之風可徵也 我朝文教
之盛可見於斯而其俗尚之有異於中華者亦可以
推知矣天之生才無貴賤一也而其貴顯賤微乃俗
之陋也苟微也人猶不能用况於其文孰貴而孰傳
之不有以輯之其何以自表以青丘風雅箕雅考之

委巷之作略槩見而亦百之一二耳豈古微而近始
盛其或埋滅而不能記耶此乃斯集之所以作也歟
其拔羣而離倫者雖非斯集自足以流傳於後而其
餘亦庶幾駸駸乎唐之傍流固不可堙沒而若劉村
隱之高行金童子重鎮之至性其卓乎可尚爾余於
金童子之歿於孝也以哀辭識其行而今於是集又
覽童子之詩尤有所起感焉遂書此而歸之
歲丁巳首夏中直大夫行 世子侍講院司書知製
教坡平尹光毅序

書昭代風謠卷首

民有歌謠其來尚康衢擊壤徵治象善惡感懲三百
篇刪述有意聖人初漢唐以後代有作觀風採俗太
史掌盛矣 我朝興詩教下及闔閭風洋洋或樂昌
辰歌畊鑿或鳴不平辭慨忼褐夫文章生無用向人
空爲巴里唱歿而身與草同腐殘篇斷簡覆瓿益遺
珠掇拾此意勤爲哀寒微名不颺披沙揀金最精約
爨音獄氣皆吐放天生柳下奚蓬蒿健筆三韓無頡
頎自餘家數雖不大瀏瀏風調亦跌宕與東文選相
表裏一代風雅彬可賞貴賤分歧是人爲天假善鳴

同一響

松岳高時彥題

昭代風謠目錄

洪裕孫

字餘慶號篠叢又號狂真子南陽人稱異人

南秋江孝溫師友名行錄曰餘慶南陽守以餘

涉獵經史放達不檢不為鄉計南陽守以餘

慶為能文放其役即步歸嶺南謁估畢齋受杜

朴繼姜

號市隱有詩名冲庵金

李精

號杏

鄭玉瑞

柳於于夢寅日中世有鄭玉瑞以詞章名

論名實端窳槩是

鄭致

字可遠號櫟軒漢川人而命是任蓋異恩也

昭代風謠目錄

權 積

劉希慶

字應吉號村隱江華人年十三而孤負土

粥勸之事母至孝母病久帖席夙夜其側未嘗

少解從南東岡彥經學禮以善治喪名壬辰倭

亂廟下車駕西幸涕泣憐煥號聚義士以助天討

宣廟下教褒賞戊午逆臣爾瞻謀廢以助天討

是絕之而遇諸塗爾瞻怒責之對曰小人有母

是於母養未暇及公之門及

曹守誠

字一之

白大鵬

字萬里

文繼朴

字德胤

尹繼宗

金復性

朱天祿

朴擎南

金忠信

鄭愛男

鄭柟壽

崔奇男

南應琛

鄭禮男

金孝一

字孝順

字子外號杏林致

字英叔號龜谷又

字子貢號松坡

字子醫和號西疇溫

字行源號菊潭

崔大立

字秀夫號蒼厓又號筠潭

梁誠一

字汝顯號小溪

金忠烈

字而彥號王湖又號雪篷金海人○東平

烈見寵姬金尚宮用事人心憤鬱上疏曰赫赫宗周衰以滅之我朝鮮三百年宗社金尚宮滅之臣為殿下痛哭疏到政院論議不一終至退斥而忠烈身在下賤言入所不敢言忠直之氣至今凛凛此無非也

李誠國

字進士官號梅菴寫字官

朴頽

字太醫司僕主簿○公私聞見錄曰醫術承

林仁榮

後世之所當法者也

李之翰

字子藩號壽谷江陰人寫字官生員

尹義立

字行誼號默叟玄風人

朴尚立

字立之號懶齋擊南之子

朴尚直

字子正號默齋尚立之弟

高益吉

字慶餘濟州人

鄭琛

字汝珍號西谷致之孫寫字官東部參奉

梁時賓

石希璞

字子成號南川漢山人從遲川崔公鳴吉白軒李公景奭竹堂申公濡游俱有唱酬

詩又孝行

金振鳴

字汝鏗號石泉全州人

崔承太 字子紹號雪蕉奇男之子

李汝完 字樂全號鶴汀永川人

鄭希僑 字惠而號鶴洲蓬山人譯官

韓仁偉 字士彥號藥叟

庾重益 字子善山陽人

金聲遠 字大而不三

朱義植 字道源號南谷羅州人武科漆原縣監善畫墨梅尚氣節

朴孝先 字行源號犁村密陽人

庾績洪 字述夫號春谷重益之弟譯官以國墓名

李起敬 初名起宗字子秀號弼雲完山人

金有慶 字子榮金海人

林俊元 字子昭號西軒沃溝人以義氣聞

崔元祥 字士休青松人

高後說 字弼卿益吉之子

李翊臣 字國卿號瓦谷完山人寫字官嘉義有筆名

崔東渙 字士深號月潭完山人

金時完 字而實全州人

崔爾泰 字子長號睡窩大立之子禮賓主簿

白孝明 字汝述金海人崔奇男之外孫

徐俊翼 字益甫號村堂扶餘人

李萬馨 字君郁 昌平人

李得元 字士春 號竹齋 完山人

嚴義吉 字彞仲 號春圃 寧越人

姜就周 字汝載 號鷺洲 晉州人

高義厚 號醞谷 開城人

林得忠 武力士 稱以勇

金 璫 字伯玉 號芹谷 又號養真堂 臨瀛人 錄事

卓柱漢 字大材 嘉平人

高後允 字漢卿 後說之弟 同樞

高徵厚 字仲父 開城人 朴尚直之外孫 譯官 同樞

朴時敏 字夏卿 朔寧人

姜後奭 字昌光 晉州人

崔承潤 字君王 承太之弟 武科 奉事

劉尚基 字德而 譯官

金志立 字君誠 慶州人

白信明 字汝實 孝明之弟

崔挺屹 字大哉 號樂晚 江陵人 萬戶

秦興祉 字天授 富平人

安慎徽 字伯倫 號春齋 順興人 譯官 同樞 有筆名

金富賢 字禮卿 號巷東光山 人 崔奇男之外孫

崔廷憲

字叔度號醉睡堂海州人性至孝年十九

驚若自後牽挽者然疾旋歸家則父病垂絕心

家號勵而胸腹間猶有氣微溫乃斷指進血少

安弘齡

字子耆

張希栻

字仁同人年

林春養

字養吾號近古齋會津人

金震煒

字汝章

李昂成

字景重號芸谷又

洪世泰

字道長號柳下又號

李君錫

字翊臣之

鄭昌海

字文若號愚隱

李聃齡

字耳老號鵬溟

石萬載

字季叟號豆

申命羲

字醫

成夏昌

字大叔

邵泰挺

字君敬

金錫龜

字夏瑞號癡

申績暹

字子華號巷

朴成赫

字汝能號石

崔東標

字君瞻

慎惟明 字晦卿號睡庵居昌人

洪世範 字汝九號果齋世泰之弟僉使

申熙溟 字津甫高靈人太醫通政

金時泰 字粹夫江陵人

李純苾 字文叔完山人

韓昌五 字直哉清州人譯官

尹弘璨 字仲獻坡平人

朴景夏 字大盛號癯溪密陽人

申興暹 字子熙號清溪橫暹之弟

林尚莢 字聖瑞號醉翁密城人

全尚瑩 字獻敬兆陽人

任璜 字仲綸初名義昌字仁伯西河人

李萬培 字益甫完山人醫員

金鼎三 字聖寶金海人

白興銓 字子衡號西樵林川人太醫嘉善

崔麟瑞 字聖汝號清耀慶州人

文伯周 字伯甫南平人

成厚勳 字集仲夏昌之子

崔世恒 字聖登築城人

朴東杞 字德老號水村密陽人

安瑞台子三之順興人

崔世欽字仲式慶州人早沒

成德文字汝晦昌寧人早沒

金喜郁字仲華錫龜之孫早沒

金重鎮父州人五歲知讀書過目即成誦朝夕在

憂喜每祭先必齋水隨長者拜跪唯謹一日乘

其假寐父故不言既以不得共祭為恨遂終其

日不食七八歲作詩有奇雋語讀小學凡書中

所言必思踐行十歲母死水勺不近口葬後因為

附錄詩話 十六人

趙崇禮

朴成原

朴思英

金千長

白德潤

金繼南

吳世俊

徐起

姜亨脩

表廷老

張應仁

安震柱

金鼎泰

郭自完

朴必華

鄭行百

昭代風謠目錄

昭代風謠卷之一

五言絕句

贈人

花落知春暮樽空覺酒無光陰催白髮莫惜典衣沽

朴繼姜

山行聞鶯

澹澹夕陽外遲遲過遠村一聲牛背籥吹破滿山雲

客中贈舊友

李精

少日朝中面何知海外逢共憐雙鬢髮白盡亂離中

春日小酌

權稹

偶訪金碁叟仍過李釀泉坐人芳草上沽酒杏花邊

山中秋夜

劉希慶

白露下秋空山中桂花發折得最高枝歸來伴明月

亂後初到仁王山

尹繼宗

鳥窠東西日那知此又來閑花春雨裏猶待主人迴

石城途中

金復性

殘照一村遠蹇驢山影邊崎嶇獨歸路風雪滿江天

曉行

雞鳴山客起遠店火微明夜冷苦思句冰粘髭有聲

旅館書懷

金忠信

萬里長為客傷時鬢欲絲鴈驚中夜夢鱸入故鄉思

奩體

崔奇男

婀娜綺窻柳昔時郎自栽柳帶已堪結長年郎不迴

怨詞

妾有菱花鏡憶君初贈時君歸鏡空在不復照蛾眉

靈泉菴

山下有靈泉圓明開法鏡了然色相空照得心源淨

觀魚潭

金孝一

披襟俯石潭皎皎秋林下誰道子非魚世無知我者

秋夜

月迥梧陰薄蛩吟草露溥離懷易怊悵不忍凭危欄

經解副摠生戰沒處

崔大立

天遠園平野秋陰生古關將軍輕敵地戰血染沙殷
集元伯西莊分韻得塢字

酌盡黃金壘醉眠紅杏塢酒醒夢亦回明月生前浦
宿極樂庵

白雲擁松扃千峰孤磬澄老僧年八十終夜話傳燈
燕坐

小閣日如年博山煙裊縷微涼乍動簾一霎荷塘雨
小詩

小詩就未就佳人來不來閒庭白日晚一鳥下青苔

觀魚潭次同遊韻

金忠烈

翠壁百尋餘澄潭連上下觀魚魚不驚知我忘機者
山寺月夜聞子規

古寺梨花落深山蜀魄啼宵分聽不盡千嶂月高低
送人

別離何太苦轉覺故人稀臨水一相送青山空落暉
次僧歸奉恩寺韻

秋風吹衲衣落葉杖頭飛明月湖邊路青山影裏歸
次韻題僧卷

簟涼秋氣近庭晚樹陰移掃榻留僧話前山雨到時

述懷

李誠國

山寺葉初飛清霜九月暮羈懷正杳然夢斷三更雨

潘中詠盆薑

朴頤

生出吾南土移來種北方低垂數莖葉稍似怨離鄉

秋日訪重興寺

石希璞

山行經幾重木落山日暮忽聞雲外鍾知是招提路

春日

老去兼身病春來感物華無端一夜雨紅墮半庭花

秋日山齋

睡罷酒初醒鳥啼山欲暮呼童開小軒秋色滿溪樹

神林寺途中

花落石門靜春深山鳥啼逢僧問歸路寺在斷峰西

白雲洞

步入白雲洞虛雲影斜山深人不見獨坐澗邊花

秋日書懷

老去漸多病秋來門掩深孤燈千里夢短髮百年心

次解上人韻

金振鳴

松風吹客襟瑟瑟奏瑤琴孤寺夜分後魂清鳴磬音

秋夜

林亭秋夜靜明月欲畱人薄酒難成醉黃花笑我貧

題畫

崔承太

箕山與潁水天下小秋毫不是陶唐化焉能有二高

又

恍惚神人履英雄變化時也知黃石略終與赤松期

少年行

白馬探春子東城南陌花出門不知處春盡始還家

登東郡樓避暑

李汝完

峽衙小如斗消暑水邊樓樓外有垂柳清風銷我憂

野宿

鄭希僑

落日下遙山悲風生古木數里未逢村月明野中宿

悼金慎仲

庾績洪

舊日西州路羊曇涕淚邊地中猶淺土堂上且高年

送春

老病偏多感佳辰又送春幽禽如會意終日語留人

城西待人

李起宗

落日下秋嶂蒼蒼煙樹迷微吟獨延佇疎雨過前溪

西隣

清吟散步遲夜氣生雲壑隣酒亦堪賒碧潭花月白

嘉平倅避雨適入仍賞盆菊

金有慶

不意嘉平守來尋舊吏家相逢無一語笑對雨中花

戊戌記感

李萬馨

鳳食竹林實高飛遊太清紛紛鴻鵠輩志在稻梁爭
村家夜坐

李得元

遠客悄無眠茅簷下殘月松火照疎林村杼夜不歇
曉行

曙色連江白寒霜蒲路痕羸驂行落葉一犬吠荒村
安州兵營示鳳鳴

袖中三尺刀與我心相照布衣入轅門嬌女拍手笑
傷春

落日照流水東風花自飛花飛不足惜人老易沾衣

遊山寺

嚴義吉

紫陌三年客青山一老僧相逢談笑處蘿月不懸燈
又

山靜夕陽滿澗寒秋葉稀老僧無箇事晴曬卧雲衣
夜坐

谷靜無人跡庭空有月痕忽聞山犬吠沽酒客敲門
春帖代人

瑞雪融初盡祥雲集不歸玉墀閒白日章奏到來稀
睡餘口占

金璫

海國連宵雨春天盡日風空齋睡初罷窗外落花紅

送崔伯瞻赴燕

高徵厚

送子上河梁遙望薊北路雪山千萬重昔我此中去

悼亡後對仲秋月

此月人皆翫吾看獨不同分明故家鏡無主委虛空

咏菊

微草幽貞趣正猶君子人斯人不可見徒與物相親

宿會龍寺

金志立

萬籟俱岑寂千峰曉月低一聲聞杜宇啼在竹林西

池亭

茅亭在池上蒼檜繞虛壁盡日風泠泠幽泉竹間落

夜坐

白信明

獨坐清無寐孤燈照寂寥三更星月晦急雨響芭蕉

秋夜聽雨

秦興祉

秋雨掩柴扉孤齋斷步履蕭蕭半夜聲窗外梧桐葉

文殊寺

金富賢

扶桑朝日出海色在山樓寥廓幾千里卧看天外舟

三清洞

溪上離離草侵人坐處生不知衣露濕猶自聽溪聲

題畫

橋上騎驢客應知訪梅去雪深山逕微獨認香來處

春日庾元亮家園

客至坐芳草樽闌生碧霞醉看衣上雪風落樹頭花

北村路上

遙指白雲洞行過黃葉村故人先有待不閉柳邊門

用唐人韻

金震煒

世事多翻覆人情互徑庭深憎俗眼白長對海山青

次鄭潤卿東山感舊韻寄申使君 洪世泰

彭澤歸應早衡門可樂飢白雲猶不散山月在虛池

聽松堂別李秀才

落日溪頭別君歸水亦流空畱春草色寂寞使人愁

聞鴈

春日江南鴈連行復北飛來時見吾弟何事不同歸

題崔子長

爾泰

石假山

我欲金剛去君家還此山何須千里外坐已白雲間

首陽山

李聘齡

叩馬人何在青山餘舊名當年不盡採薇蕨至今生

題畫

石萬載

歲暮江天雪孤舟下夕灘蕭然鶴髮叟深趣在漁竿

客行

日隱遙山外天長倦馬前萍蹤苦漂泊明日又長淵

作客

邵泰挺

作客南中久南中多舊知南中今又別如別故鄉時

哭從兄煥字甫墓

金錫龜

世事嗟何說兄亡弟不聞今來滿袖淚獨灑北邙雲

流頭

提壺來郭外佳節是流頭閒卧松陰夕清風不讓秋

九日對菊懷洪僉使績詩以寄之

朴成赫

年年重九約今日又相違籬下數叢菊笑君歸未歸

東郊

申熙溟

樹擁疑無路山開忽有村田翁眠藉草清夢繞平原

春雨

尹弘璨

柳色雨中新桃花雨中落一般春雨中榮悴自堪惜

江村秋夜

朴景夏

收竿下煙渚蒲末繫孤舟夜傍羣鷗宿平沙月影留

紫陌春雨

東風紫陌來興與春雲聚醉卧酒爐邊衣沾杏花雨

水閣

任璜

濯足林間泉悠然卧白石夢驚幽鳥聲細雨前山夕

暮過松都門樓

李萬培

寒煙繞舊郭新月入虛樓駐馬傷秋草興亡水自流

七夕

成德文

天上雙星會人間一葉飄年年銀漢渚烏鵲自成橋

溪閣

金重鎮

溪閣晝眠罷空濛秋雨時遊人日暮去蒲地落殘棊

昭代風謠卷之一

昭代風謠卷之二

六言絕句

上申相國

欽

金浦田里之行

劉希慶

碧水溶溶入海青山鬱鬱連天孤舟載鶴歸去誰識

西湖老仙

雜興

丹經讀罷出門洞裏初收暮雲無人與我對酌明月

來照芳樽

又

樹梢新涼初至潭心霽月寒浸幽人竟夜不眠松濤

浙瀝喧枕

次新昌權鶴峰寄韻

鄭耕壽

夢裏音容隔久鴈邊消息來稀白雲那得相贈來詩有滿

壑白雲難贈之句紫陌空慙未歸

題僧廊

崔大立

前峰後峰落照一點兩點歸鴉客到僧廊講罷茶煙散雜松霞

中和途中晚晴

山下林鳩喚晴村邊野杏如雪幾處斜陽漏雲人家一半明滅

招人

池邊芳樹清陰園裏新禽好音借問君來幾日蘭尊綠醕孤斟

雨後

綠添門外溪水紅綻階邊海榴日午暫拋書卷客來且試茶甌

病中寄鄭子久耕壽

堂上佳賓滿座清談玉屑霏霏文園自是多病寂寞經年掩扉

重興寺

金忠烈

路入青山影裏人歸流水聲
中月上僧廊夜靜桂花香
散天風

山中晚眺

水流東澗西澗雲起前峰
後峰落日遙看去鳥沉吟
獨倚深松

題石生

希璞

齋四時 春

撲地殘花幾片嚼泥嬌燕
雙飛盡日鈎簾獨坐一庭
微雨霏霏

冬

窗外風敲竹葉庭前月映
梅枝茶鐺絕似陶穀雪棹

時尋戴逵

次玉湖金丈四時春冬二首韻

石希璞

竹扃深掩客斷春意欲闌
花飛隱几幽懷悄悄近簷
山翠霏霏

雪意方催蜡臘冰魂忽返
瓊枝窻下端宜讀易剡中
何必尋逵

春興

李得元

小院茸茸草色晴簷欵欵
禽鳴閒中日月無事夢裏
溪山獨行

夜坐有懷

才明个風詩卷之二
三
遠別悠悠幾日相思耿耿深情殘燈欲滅未滅獨夜
二更三更

宿重興寺

月出白雲峰上鍾鳴太古庵中夜久禪窻無寐泉聲
更雜松風

爲李處士詠盆梅

洪世泰

窻外千峰積雪床頭一樹寒葩看君道骨清甚莫是
身學梅花

又

眼明忽驚新蘂坐久渾忘暗香夜來抱琴花底恰有

孤月流光

又

縱在人間非俗却從林下爲生不恨終身寒苦自知
稟性孤清

又

花中亦有高士天下豈無真仙流水青山境界小窻
烏几因緣

又

窮陰剥處生意明月圓時返魂雪埋山下幽逕春動
水邊孤村

昭代風謠卷之二
秋思

碧梧迎風初落孤蟬飲露彌清可憐鏡中白髮更着
窗外秋聲

過鰲山人舊居

石萬載

玉洞孤雲捲舒半山殘月清虛仙翁一去何處芳草
千年舊墟

昭代風謠卷之二

昭代風謠卷之二

七言絕句

觀音寺望日出

鄭致

清晨薰沐上高臺目極扶桑曙色開風動玻璃金柱
立彩雲擎出九鳥來

月溪

劉希慶

山舍雨氣水生煙青草湖邊白鷺眠路入海棠花下
轉滿枝香雪落揮鞭

宿圭峰伏次葛川先生韻

乾坤都入一壺中袖裏涼生駕斷鴻旭日纔昇雲捲

盡亂山如垓散青空

次鄭可遠韻

曹守誠

飄泊天涯今幾載
再逢青眼是關西
一宵難盡平生語
把酒如何更聽雞

九日

白大鵬

醉插茱萸獨自娛
滿山明月枕空壺
傍人莫問何爲者
白首風塵典艦奴

題贈鄭可遠

文繼朴

東西南北盡相知
交道何曾有變移
半世無心營爵祿
只緣憂國淚長垂

冬夜口占 回文

鄭耕壽

傷時此志舊題橋
匣劍看來坐寂寥
霜樹凍鴉啼啞啞
月庭寒竹翠蕭蕭

塞下曲

崔奇男

將軍自領五千兵
鐵馬貂裘夜出城
雪沒錦鞵關月
黑暗從沙路斫胡營

清明

上巳清明取次過林居
寂寞送年華
雲陰垂野寒猶峭
三月江城未見花

閒中用杜詩韻

綠樹陰中黃鳥節青山影裏白茅家
聞來獨步蒼苔
逕雨後微香動草花

謾興

卧穩匡床睡起遲始知身病是閒時
微涼透箔雲陰
澹杳塢蒲盆雨亦宜

冬日書齋

窮巷寥寥客不來凍雲晴雪映庭隈
清虛果腹忘飢
渴讀易床頭有古梅

田單墓

鄭禮男

千古英靈土一丘停驂為爾起新愁
黃金橫帶當時

路溜水無情日夜流

秋思

金孝一

蒲庭梧葉散西風孤夢初回燭淚紅
窗外候蟲秋思
苦伴人啼到五更終

花映潭

二十年前此地遊洞天巖壑幾冥搜
重來今日還怱
悵赤葉黃花映白頭

鷓鴣

青草湖波接建溪刺桐深處可雙棲
湘江二女冤魂
在莫向黃陵廟裡啼

贈俊上人

求仙已晚擬逃禪
試向秋山與渺然
三十九年成底事
世間愁病易華顛

送崔英叔遊湖右

崔大立

五陵裘馬自翩翩
隻眼誰能識汝賢
歲暮北風吹雪急
天涯此別故人憐

喪室後夜吟

睡鴨薰消夜已闌
夢回虛閣枕屏寒
梅梢殘月娟娟在
猶作當年破鏡看

塞上

白草原頭兔正肥
黃雲戍上皂鵬飛
將軍年少耽遊獵
火照城門候夜歸

勸君

勸君莫辭金卷荷
清歌一曲浣溪紗
東園昨夜風和雨
樹底花多樹頭花

遼河

寧遠城高計已違
盤山道上橐駝饑
笳聲吹落遼河月
淚濕名王貂錦衣

沙河戰

沙河落日戰塵昏
十里波流虜血渾
火照前營笙鼓

競夜驅馳馬入城門

金河戰

官兵處處陣如雲節度諸公不負君一樣高旌并大纛胡兒惟諗那將軍

宮詞

深宮晝靜轉黃鸝針線工夫繡就遲偶向園中逢伴侶白櫻桃下語移時

暮春病中

三月幽人病起遲經春未賦賞春詩園禽喚起梨花夢簾捲東風雪滿枝

練光亭別後

鈎盡湘簾獨倚樓酒醒人去又生愁桃花水漲春江濶何處飛來雙白鷗

院中卽事

金忠烈

輕寒透入碧窻紗苑樹千重雪作花閨闔晴開霄漢上觚稜初日絢彤霞

江頭晴望

長堤十里柳和煙步出江頭雨後天水滿汀洲芳草綠白鷗飛上釣魚船

潘中贈別朴同知東歸

玉門關外三更月青海城邊萬里身今夜轉添歸思
苦明朝又送故鄉人

塞下曲

蕭條獨上李陵臺落日悲風萬里來隴水亦知征戰
苦至今嗚咽向人哀

春江泛舟

青帘高出杏花村沽酒歸來日已昏醉卧蓬窗春睡
穩不知風雨滿江門

長門怨

隱隱昭陽隔彩霞繡闌愁立日西斜春風不與君恩

斷開遍長門宮裏花

賢上人房集句次同遊韻四時 春

瀑布遙侵玉砌陰盧藏用鳴鳩拂羽歷花林李端山

僧獨在山中老劉長卿坐卧閒房春草深李頎

夏

石床溪水晝陰陰李端閑士幽居祇樹林李頎白雲

多處應頻到賈島踏破蒼苔一逕深司空圖

秋

野寺昏鍾山正陰盧綸白雲山上宿雙林李端草堂

不閉石床靜張籍松桂月高僧院深許用

冬

蕭寺樓臺對夕陰

劉滄

風生萬壑振空林

李白

鑪煙

銷盡寒燈暗

李義山

門掩荒山夜雪深

許用晦

仁王山偶吟

林仁榮

仁王山下少人來
岸幘孤吟坐石苔
日暮東風春寂寂
巖花無數望中開

天壇

李之翰

霓旌夜下水晶宮
星斗闌干月滿空
曲盡鸞簫曉無跡
碧壇丹桂自秋風

東湖

尹義立

千山歷盡一帆風
晚泊終南漢水東
芳草渡頭漁唱起
白鷗飛散夕陽中

林居

朴尚立

山齋幽寂晝陰斜
滿地蒼苔半落花
溪上獨來誰與伴
水禽終日立楂牙

訪書堂有感

高益吉

白髮重來坐小亭
手栽桃李掩階庭
春風物色渾依舊
壁上題名半已零

馬上吟

鄭琛

秋生海國氣蕭瑟
萬里征人猶未回
鴻鴈亦知南土

苦悲鳴何事此間來

張淵途中

梁時賓

九月山前過信川首陽城北指長淵平原落日孤雲
外却筭鄉關路一千

秋日過休翁郊居

石希璞

松橋石澗少人過野外蕭條祇數家霜落疎籬秋色
晚白頭無酒對黃花

松京懷古

山河依舊市朝空流水殘雲落照中歇馬獨來尋往
迹斷碑猶記鄭文忠

過友人村莊

薄暮驅驢到石田蕭條風葉正秋天數村茅屋清川
外蒲樹蟬聲細雨邊

漢江卽事

雨後東風漢水湄閒花細草夕陽時泊船步入橋西
路垂柳門前有酒旗

武夷洞

神仙遊迹白雲中笙鶴何年向碧空澗水泠泠人不
見杏花微雨自春風

暮春尋寺

召式風雅卷之三

八

晚尋蕭寺出溪東春事寥寥半已空
疎雨落花山下路馬蹄無處避殘紅

次儲光羲韻

崔承太

垂柳陰陰夾小蹊短橈已戛入清谿
採菱兒女紅裙濕拍水鴛鴦錦翼低

武溪

溪上離離無數石林中寂寂兩三家
獨携藜杖坐溪畔照眼還憐石竹花

郊行

溪流激激石杈牙野鶴盤天日欲斜
騎馬獨歸芳草

路杏花晴映兩三家

送李士春赴南兵營

詞人膽氣逐戎旃六月寒生寶劍蓮
北出關山千里外馬頭風雨近胡天

秋夜獨坐

積雨初收夜色清銀河如練月輪明
閑簾久坐梧桐影葉上時聞墜露聲

塞下曲

大漠秋雲殺氣多單于飲馬白狼河
千軍夜出陰山下滿磧寒霜拂劔花

海州芙蓉堂次韻

鄭希僑

水檻風來夏亦涼
滿池荷月正蒼蒼
只愁白露凋紅粉
減却鴛鴦夢裏香

春日

韓仁偉

喃喃玄鳥喚春忙
花發簷前日復長
多病老身無別事
藥欄微雨種荷香

山海關

一自降臣解佩刀
將軍臺上盡蓬蒿
愀然獨立譙樓夜
萬里城頭片月高

郵亭

庾重益

暮年蹤迹寄郵亭
草食還堪養性靈
閒卧土床無外事
拓窻長對北山青

客中有懷

金聲遠

幾年南鴈送西州
黃菊江城又一秋
家在漢東歸思切
月明長遂是誰樓

項羽

朱義植

英雄運去嘆天亡
八載干戈夢一場
不獨江東羞父老
泉臺何面拜懷王

夏初遊朴奉事花園

朴孝先

暇日名園杖履來
青松陰下綠樽開
薔薇花發三千

采賓主風流一百杯

永平夷齊廟

度續洪

灤河不盡古今清天地綱常此弟兄看取義辭周粟日採薇歌曲亦殷聲

江村春興次湖丈韻

隔浦漁家聚作村舟中一半度朝昏江南去趁魚鹽市無數春帆出海門

又

隱映桃花樹裏村綠叢歸處雨初昏商姬賣酒臨江店三兩漁船繫在門

將投山寺

李起宗

明朝欲赴岳僧期坐送清宵玉漏遲扶筇試出柴門外月隱花陰露墜枝

喜仲瑞過

林俊元

樊廬多日斷將迎獨見炎涼不易情一笑坐來開北牖柳塘微雨午風輕

武溪洞

高後說

高林初日破秋煙石上爭流雨後泉十載重來吾已老白雲依舊洞中天

煙寺暮鍾

李翊臣

洞府煙沉石逕陰夕陽山寺客難尋風前隱隱鐘聲
落僧在岩曉第幾岑

送曹慶宣之江都

崔東渙

樽前握手問歸期爲折河橋楊柳枝離別邇來何太
苦篋中強半送君詩

昭陽江

金時完

平沙鴈落白蘋秋獨倚昭陽江上樓遠浦蕭蕭微雨
裏數聲漁笛在歸舟

逍遙亭晚眺

崔爾泰

逍遙亭北望江天點點沙鷗破渚煙一片孤帆秋色

外數聲漁笛夕陽邊

幽居卽事

睡罷茅齋日欲斜溪邊汲水煮新茶小庭寂寂無餘
事閒看兒童拾落花

宿山寺

白孝明

禪燈明滅夜將闌無限風聲在樹間坐待三更山月
出石樓清磬度前巒

凝香閣

李得元

凝香閣裏夜悠悠人倚欄干十二頭涼意滿簾無夢
寐一池荷葉雨聲秋

秋夜

簾影玲瓏月欲過起看銀漢澹無波深宵獨向空階
立露濕青桐秋意多

荷塘夜雨

醉眠初覺滿簾風一點青燈照壁空池上宿禽棲不
定雨聲偏在敗荷中

曉行

山下孤村盡掩扉峰頭落月隱餘輝雞鳴野店客行
早雪滿官橋人迹稀

途中用前韻

長途倦客據鞍眠路轉清湖芳草邊夢逐雲間雙白
鶴翩躚直過海東天

途中

姜就周

落葉隨風飄馬前高秋客意轉蕭然鳥歸深樹人歸
郭日暮孤村生白煙

司馬相如

司馬聲名天下聞至今詞賦播清芬生無一字匡君
語篋裡空畱封禪文

瑤池宴

高義厚

瑤池高宴日邊開鳳管初調各進杯移席一時分隊

立帳前傳道穆王來

詠菊

有花無酒可堪嗟有酒無人亦奈何世事悠悠不須
問看花對酒一長歌

題崇禮門樓壁

林得忠

畫閣岩嶢出半空登臨恍若跨飛鴻平生壯志憑無
地獨卧乾坤萬里風

過屈氏墓

金璫

屈氏卽 皇明簪纓家女也 昭顯世子質
燕時見而憐之 鶴駕東還與之俱歸及

東宮昇遐入侍 長秋宮凡數十年後出居

臨昌公子第以天年終墓在高陽郡大慈長

嶺山之麓

草似羅裙花似鈿斷原埋玉幾經年年寒食清明
節惟有宮娥送紙錢

秋夜

朴時敏

秋天寥落夜凉多月色雲容澹似波莫遣西風催玉
露恐殘窗外小塘荷

大風

姜後奭

獨夜殘燈坐讀書寒聲忽起打窻虛飛廉何事欺吾

老偏入窮村捲草廬

礪山挹清樓

金富賢

碧山斜月映簾櫳清夜迢迢夢易空客裏秋懷倍蕭瑟碧荷池上有西風

海邊避風

海上風雲陰復晴海門三日浪崢嶸舟人且繫沙邊纜雷雨前頭有鬪鯨

題道長寓舍

草際蟲鳴山日斜疎林寂歷帶秋花看君飽得煙霞氣坐取終南半入家

驪江

東來一洗世間憂泛泛滄波任遠遊無數好山舟上過不知身已到忠州

城西夜詠

多病年來白髮生暮秋風物更淒清山窗坐聽蕭蕭葉不怪新詩有楚聲

秋夜望月有微雲點空仍賦

安弘齡

望月高樓坐夜長虛簷風露濕衣裳浮雲一片來何處點綴青天萬里光

春日訪金上舍

締漢

不遇

李昂成

才賦何風詩卷之三
一五
一道清溪抱崖迴隔林何處野棠開春深院落無人
到收拾風煙滿袖來

一歧放舟

洪世泰

橫海孤槎路不迷長風吹我入無倪相隨獨有青天
色却視扶桑在水西

秋興

野人籬落過重陽滿地寒花寂寞香何限秋光渾不
管獨畱蟲語五更霜

有感

處世何人百歲能一生歌哭苦相仍今朝又報阿兒

死却憶頭陀峰上僧

咏畫

草澤潛光世莫猜釣臺曾不換雲臺平生悔識劉文
叔多事羊裘物色來

題贈睡窩

塵中也有玉壺翁飽食千年枸杞紅白髮滿頭纔數
寸樂貧歌罷背西風

李大來內挽

絃絕孤琴不忍彈碧梧風雨鳳棲寒篋中尚有殘衿
佩畱與孩兒長後看

永川途中

天寒雲日淡無輝鴻鵠乘風却倒飛數騎木弓垂馬腹御營番下彥陽歸

西遊為謀生計蓋不獲已也行期既卜因事屢止而且墜馬若有魔戲然乃決意清平之行

西行未就且東遊得失由天不自謀一笑清平山下路何人爭我白雲秋

挽睡窩崔子長

壺中天地玉山前鶴髮韶顏八十年市巷日高呼不起只疑猶作據梧眠

又

去秋要我一相過枸杞叢邊記醉歌庭際數峰依舊在閉門黃葉雨聲多

晚村雨後

李君錫

平原漠漠雨初過十里青山一帶霞斜日斷橋人去盡孤烟寥落兩三家

六臣祠

鄭昌海

行人莫唱子規詞此曲當年不盡悲惟有六臣長夜淚魯陵松柏灑無枝

寧越加斤洞

石萬載

松檜陰陰石棧危子規啼斷暮春時傷心欲問蒼梧
路落日愁雲鎖九疑

海州清聖廟

當時大節植綱常二子清風萬古長 聖代卽今新
賜額首陽山色更高蒼

水閣

睡罷高樓已夕陽隔窗蟬語報新涼無端風雨西南
至萬樹秋聲繞一床

直廬謾吟

小堂寥落夢初回一壁殘燈半已灰深夜擁衾仍獨

坐漏聲遙自建陽來

平澤途中

成夏昌

倦馬長途相識稀風吹柳絮入春衣旅遊南北成何
事白髮滿頭猶未歸

江華路中

崔東標

寒日西沉細路微石門紅葉馬前飛雲林度盡鍾聲
遠流水潺湲宿鳥歸

景福宮

洪世範

此地吾 王舊法宮至今佳氣鬱蔥蔥遺民尚荷昇
平澤醉卧龍池柳下風

釣臺懷古

金時泰

七里灘頭舊釣臺
蒼苔錦石淨無埃
祇今不見羊裘客
沙上惟餘白鳥來

清心樓

李純苾

西風江樹一蟬秋
百感浮生易白頭
臨岸忽聞人語響
清心樓下有歸舟

琵琶潭

尹弘璨

屋下深潭百丈清
白鷗飛處釣舸輕
斜陽獨向苔磯坐
鱗鱗銀鱗逆水行

暮春

申興暹

短短疎籬山下家
松簷遲日鳥聲多
無端昨夜前溪雨
落盡閒庭一樹花

謹次 御製濟州移粟韻

林尚茨

耽羅移粟最艱難
海外民饑 聖念關一日
天章傳萬口 卽知恩澤浹惇鰥

禁苑聞鶯

紫陌春風柳色齊
黃鸝無數影高低
百般機巧如簧舌
莫遣飛來禁裏啼

夜歸郊庄

全尚璧

立馬沙洲日欲昏
渡頭行客自相喧
空林暮雨歸來

昭代風謠卷之三
晚寥落山家不掩門

鳳凰城秋日

金鼎三

荏苒天涯歲月流西風斷鴈鳳城秋中宵欲作還家
夢美遂無端喚客愁

題贈任仁伯

璜

山人無事亦無心床有真詮膝有琴一咏一彈清趣
足更看雙鶴舞庭陰

彰烈祠

文伯周

一鼓殲兇間世豪千秋義氣仰山高廟庭白日神靈
雨多少行人薦澗毛

昭代風謠卷之三

昭代風謠卷之四

五言律詩

太古亭

劉希慶

暫過清溪洞仍登太古亭庭雲人不掃澗水客來聽
細竹當簷冷長松拂壑青何時謝塵土此地送餘齡

九日陪柳文學登北麓

松間開小酌兩岸石苔斑亂壑泉聲細層城夕照寒
秋陰生古木雲影度空壇巖下崎嶇路扶筇獨自還

江亭次成雙泉

汝學韻

嫩綠門前柳微涼檻外風乾坤分上下日月見西東

萬象孤吟裏千山一望中漁樵生計足愧我枕流翁

秋日

白大鵬

秋天生薄陰華嶽影沉沉叢菊他鄉淚孤燈此夜心
流螢隱亂草疎雨落長林懷侶不能寐隔窻啼怪禽

奉呈使相

朱天祿

塞徼催傳箭三軍不可留推鋒誰敢死輓粟卽如流
倚劔磨天暮揚旗豆滿秋追攻宜勿失斬獲忽酋頭

瑞山途中

崔奇男

殘陽驅匹馬側逕入深松谷響聞人語林行見虎
山川凌絕域冰雪值窮冬可惜重來地羈愁減舊容

三清洞

水應孤吟響山迎側帽斜曙巖晴抱日春洞暖生霞
綠膩仙壇草香飄玉井花窮途羞白髮何處問丹砂

晚次公州廣程倉

蕭索人煙少周遭嶺嶂稠飢禽集長薄倦馬飲寒流
地窄頽陽瘦風饕古木愁何時稅征駕浮世本如郵

奉恩寺

湖寺曾遊處梅花記往年僧歸二陵雨客渡廣津船
兩岸蟬聲合中洲樹影連明朝解行纜悵悵下江煙

客中秋日

昭代風雅卷之四

一一一

病卧干戈際愁多旅寓中異方親舊少佳節往時同
暝送千山雨寒催萬木風那堪對搖落今歲又將窮

奉別申相國金浦田舍之行

此別意何如相逢十載餘西湖泊舟處南岳暝鍾初
調去見孫長歸來故舊疎暮年游已倦桑梓返郊居

宿遼陽太子江

南應琛

倦遊千里外危鬢日蕭蕭地入燕山大天連鶴野遙
淚沾芳草路魂斷夕陽橋風雨沙汀畔那堪過此宵

三义河途中口占

七渡龍灣北三過鶴野西地連沙塞濶天入海門低

旅食三义遠行裝一劍携夕陽江上路心事轉淒淒

鮑石亭

鄭禮男

白日風塵起君王醉不知客來黃葉後鴉噪夕陽時
石老魚形折沙崩水勢移繁華問無處登眺有餘悲

燕京人日用杜工部韻

異國逢佳節悽然憶舊時天涯爲客久鄉信隔年遲
勝裏金花冷樽前白髮悲春盤同俗事新菜細如絲

夜泊江村

金孝一

浦口月初上漁人撐小舟夜風吹細浪春岸起眠鷗
燈火野春急磬聲江寺幽故居亦如此歸思滿滄洲

塞上曲

漢武開邊遠征人尚未歸月低遙戍角寒入去年衣
磧樹秋聲早關雲曙色微朝逢探騎問前隊被重圍

過故都

行人傷往事落日倚荒城獨鳥歸林遠寒山帶水橫
村春幾家在漁火一川明弔古兼懷土那堪羈旅情

夜坐

萬事凋雙鬢孤燈照五更名因貧不立愁與病相嬰
蔣逕誰披草陶籬自掇英安排但知命此外更何營

送圓上人歸蘿菴

此去無多遠西行十里間風泉鳴舊壑蘿月滿秋山
野客時求藥隣僧夜叩關仍思昔遊處詩壁錦苔斑

文殊寺石門次崔英叔韻

共有尋真約携筇上翠微九秋餘幾日千嶂又斜暉
石出溪聲少霜高樹影稀暮鍾何處寺林外一僧歸

漫興

樂在貧還好閒多病亦宜燒香春雨細覓句曉鍾遲
巷僻苔封逕窻虛竹補籬笑他名利客終歲任驅馳

客中送人

殊方久爲客今夜又離君別酒酣淮月歸程入楚雲

歲華行欲盡鄉信杳難聞絕塞孤飛鴈嗷嗷獨叫羣

登樓

世事紛興替江山自古今有懷常汗漫乘興復登臨
葉盡秋聲斷波澄月色深故園遙入夢衰淚欲沾襟

秋夜書懷

小塘微雨歇虛幌集新涼燭影寒棲壁蟲聲故近床
任貧詩有債嬰病藥無方萬事悲歌裡蹉跎四十強

龍川道中

崔大立

八月霜氛肅關河葉互飛野晴雲澹澹山晚日輝輝
古驛人煙少孤城獵騎歸那堪值搖落征路一沾衣

遊松川洞

洞邃疑姑射溪回似武夷蘿攀新蔓弱橋踏古查危
白髮嗟吾老青山見爾遲題詩石壁上畱與後來知

寄贈逍遙寺法雄禪師

十笏禪房小燈從七祖傳齋心水恒淨覺性月長圓
門對千峰掩身披一衲穿微官是吾累問法定何年

閒居

數畝居仍僻圖書靜裏披門扃客歸後茶熟酒醒時
窸窣風鳴箔霏霏雨滿池人生貴自適軒冕豈余期

義州城樓呈柳判官

華筵敞高閣綠酒滿金壘海樹春陰積江門晚色開
客無崔顥句主有柳州才日暮燃官燭何妨盡醉廻

真觀廢寺

千年梵王宇寂寞洞中雲有身棲蓮座無僧看貝文
巖蹊流水咽春殿落花紛自恨歸依晚三乘法未聞
七夕宿齊安館憶故園諸友

客宿齊安夜虛堂暑氣徂煙沉官樹暝雨暗驛燈孤
小酌聊酣興悲歌亦壯圖鄉園朋舊會還遠憶人無
卧病

百病衰遲後三春寂寞濱藥爐常撥火酒筭欲生塵

庭午花陰靜簷暄燕語頻蒲團將絮枕惟爾我相親

賃居

主人李公時
爲文川作

地僻經過少閒門盡日扃誰知葉令宅便作草玄亭
苔髮侵階碧花氣入戶馨厨人報茶熟恰是午眠醒

文殊寺贈熙上人

偶過招提境仍登演妙壇侵雲巖路細瀉月石泉寒
幽興吾康樂禪心爾懶殘他年重問法還肯借蒲團

贈人

梁誠一

碧落金波淨青桐玉露寒水流時序急霜逼鬢毛殘
古曲知音少浮生會面難誰憐和氏璧按劍却相看

對雨

金忠烈

北風吹晚雨颯颯滿西林老樹寒蟬歇層城積靄深
危途甘屏迹萬事不關心惟有殘書在端居閱古今

次姜子衢

亨脩

雞林懷古韻

千載興亡地行人一愴心前朝畱短碣往事聽寒禽
廢苑秋花落荒臺野草深獨驅羸馬去城樹晚陰陰

雲興館次韻

候館休征騎頽陽隱古城地寒邊色近山峻夕烽明
到老心猶壯憂時劔自鳴長吟出塞曲悽斷不勝情

秋日郊居

斗屋依林巷衡門帶夕陰秋風吹雨過落葉滿庭深
潘岳閒中賦文園病後心沉寔成白首世路少知音

秋日書懷

寂寞門長掩支離病未蘇暝林寒雨密虛箔一燈孤
短髮驚全老流年覺已徂秋風正蕭瑟木葉下庭隅

奉恩寺次韻

江路花如錦禪門日似年鷗眠芳草岸僧到夕陽船
檻外春潮濶窻前碧岫連明朝廣陵道回首隔蒼煙

浮碧樓次牧隱韻

暫歇西來騎斜陽獨凭樓雲深麟馬窟木落涓江秋

白髮餘年幾清樽盡日遊長吟牧老作千載想風流

與友人對酒仍吟客懷

李誠國

故國非無路胡爲歌式微自從身久客於世計還違
急節如流水歸心對夕暉湖山一樽酒衰淚爲君揮

入山作

石希璞

落日騎驢客穿林一逕遙巖敲棲鶴樹溪卧度僧橋
寺近時聞磬山深不見樵此間心境寂幽興轉蕭條

江界贈謫友

一別秦城後于今歲幾回死生人事變憂樂髮華催
旅館蟲吟苦關河鴈叫哀天涯還此會忍淚對含杯

題李判官郊居

洞府春將盡茅簷日復長暖風芳草軟微雨落花香
白首身猶健青雲夢已涼惟餘詩酒習興到或顛狂

曉發成歡驛

暮宿成歡驛侵晨問去程短童愁遠役羸馬物前行
葉盡孤村樹山圍百濟城鄉園杳何許回首一含情

秋夜示友生

庭樹秋光晚綿衾夜氣清枕邊燈一點窗外月三更
守拙從吾性論詩見爾情苦吟仍不寐雞報曙河傾

九日退衙寫懷

召代風

公退心還靜歸家興更長兒傳桑落熟我愛菊花香
令節終難負浮生只可傷東籬明月上對此一含觴

題蒼厓別業

別業何蕭灑春來晝掩關引流方作沼壘石矗爲山
鳥語生簷角梅香逗枕間琴樽靜相對遲暮可怡顏

題高弘載書齋

崔承太

北里題詩罷西隣日暮歸杯樽隨處有意氣古來稀
夜久燈花落庭昏雨色微搔頭朝欲起愁絕趁衙衣

秋日憶山中

佳期每不遂悵望白雲歸楓葉爛秋色石門餘落暉

步林侵雨潤嘗果摘霜肥坐想山中興空令身欲飛

宿薪院

日暮行人少山家早閉門鴈呼沙上月砧動水南村
客裏誰相語燈前獨斷魂筭來行漸遠明日過西原

感懷用洪生

世泰韻

知己古來少英雄跡自孤伶俦隨薄俗偏側因危途
晚托詩人社時尋酒肆墟長風吹萬里濯足戲江湖

贈別李士春

遠逐將軍節春風嶺路千開營桑海上伐鼓瘴雲邊
衣褐叅戎策揮毫咏幕蓮臨行何所贈媿乏繞朝鞭

不取个風言卷之四

用石

鄭希僑

歲暮文園病天寒范叔衣誰知老夫興來叩故人扉
步履鳴秋葉圍棋對夕暉談詩共娓娓風雨夜深歸

三清洞

六月朱炎日三清白玉壇雙眸與山碧兩腋挾風寒
此地堪韜迹何時得掛冠明朝返城市林壑夢中看

站上漫題

庚重益

客軒岑寂甚邊報亦云稀白首身何困青雲計已違
草深村路細溪淺水聲微每與隣翁去携竿坐釣磯

雪夜宿山寺

朴孝先

筇飛青漢外路出白雲層紺宇多年夢溪山此日登
松風清梵韻雪月照禪燈欲問三乘話塵心愧老僧

秋夜

庚續洪

寂寞僑居僻階庭秋草多高風吹落木涼月動明河
客病三年藥鷗盟萬里波白頭添潦倒歸計日蹉跎
寄洪道長

晏起仍成趣終朝不啓門好音來鳥語生意在苔痕
野性殊非俗城居便是邨何時一壺酒春事與君論

書懷

李起宗

小病添暮境幽抱有誰知髮白羞看鏡窻明愛閱詩

澗梅催臘近堤柳入春遲寂寞門長掩天寒卧雪飢

贈別仲瑞北關之行

林俊元

九月關山道繁霜草木衰塞鴻南去日游子北征時
晚節稀親友今秋再別離西樓文酒地興到祇相思

臨津曉行

夜宿坡平驛侵晨復遠征雲霏山路暗燈火水村明
立馬星初落撐船潮欲生漁樵有夙計衰白又茲行

公山道中

崔元祥

迢遞公山路支離笑此身雨行花暖驛風渡錦江津
湖海南通越乾坤北望秦故鄉今已遠回首一傷神

鳳陽旅店

高後說

倦遊西北客天地一浮生白髮傷遲暮清秋賦遠征
鴈驚千里夢燈照兩鄉情落木兼風雨明朝又滯行

夜泊黔毛浦

李得元

大澤無煙火蓬窻夜已分月低孤棹影波動衆星文
客夢迷芳草歸心繞白雲秦城一千里消息若爲聞

壺山館次板上韻

不寐坐中夜自然離恨新秋陰生古館涼吹韻叢筠
鞍馬成何事乾坤老此身空餘匣中劒脉脉獨相親

夜坐

懸燈虛館裏，獨坐意悽悽。旅病誰相問，家書手自題。
亂山斜月落，深夜怪禽啼。不寐仍愁絕，孤村已曙雞。

雨夜泊真島

去歲別京國，今來雲海遊。誰憐千里夜，獨抱萬端憂。
急雨鳴秋葉，疎燈照客舟。浮生謾漂泊，回首愧沙鷗。

晚次蜩島

身世如蓬梗，漂流到海涯。遠天浮積氣，孤嶼上層波。
澤國淹蹤久，鄉園別日多。羈懷更搖落，薄暮聽漁歌。

次春谷九日用杜詩韻

對酒人何處，登高事已非。舊遊空入夢，浮世欲沾衣。

老樹秋陰薄，寒天日色微。可憐歡笑地，寂寞掩柴扉。

秋夜書懷

書劍終何用，蹉跎鬢欲華。歸田無舊業，寄跡賃人家。
病意秋偏感，陰蟲夜更多。虛窻愁坐久，月落曙河斜。

次贈朴汝弼

感君一相顧，傾我百年心。脫劍燈前坐，論交不用金。
霜風吹月落，畫角報更深。豈料關山雪，還聽郢客吟。

嶺南旅舍逢林子昭夜話

昔別洛陽陌，今逢天一涯。笑言翻似夢，衰鬢各成絲。
海雨連宵暗，蠻風入座吹。異鄉青眼會，惟有小燈知。

春日書懷

嚴義吉

洞壑春來早林園客到稀風塵吾計拙湖海世情微
垂老雙蓬髮休官一布衣兒童亦解事移柳護柴扉

田父詞

姜就周

野老驅牛去放牛青草邊荷鋤除亂莠植杖決深泉
花發家家樹煙生曲曲川倦來仍自嘯歸卧隴頭眠

三藏寺用板上韻

卓柱漢

秋色千峰裏溪聲一路中林風正蕭瑟山日已高春
草有三椹綠塵無半點紅諸天看漸近誰謂我途窮

龍門山

崔承潤

山接羣峰簇川迴列壑通捫蘿登絕頂騁目望遙空
心豁滄溟月神清閬苑風鸞驟如可御天路任西東

初夏南園卽事得居字

劉尚基

坐卧南山近城闕此靜居高談青史上佳賞綠陰初
吟外乾坤大樽前禮法疎清風如會意頻入竹簷虛

城西與諸子夜話

崔挺屹

縱是住人境圖書一室清不期今夜會何限老夫情
白酒當秋熟黃花又月明稻梁吾計拙鴻鴈解南征

送友赴燕

秦興社

少年遠遊邁直向黃金臺駿馬從何去郭生不復來

停橈易水上撫劔長城隈尚有風雲氣於茲莫謾哀

蒼雪公寓直秋曹邀余夜話

金富賢

客到公齋宿閒宵吏事休柳風吹急雨荷氣動新秋
遠響傳三鼓微涼在一樓仙郎有詩句不寐且相酬

奉寄槽巖李叅奉

鳳年

滿地皆華屋斯人獨草廬
門外轍積有案頭書
潭水停來靜天雲過後虛
乃知君子意求分不求餘
雨後有懷

宵分燈欲晦獨卧小齋幽
簷果落於雨砌蟲鳴及秋
病中驚晚節詩裏說閒愁
久負曹溪約遙憐巖瀑流

出郭

村野一荒落仲冬風正寒
雪深微有路冰結半無灘
內手還忘策吟詩尚據鞍
佛巖看可喜迎我出林端

步槐原

閒來北山下獨扣故人扉
寂寂鶯相語紛紛花亂飛
日舍孤嶂去春與逝川歸
對此那無酒吾今欲典衣

舅氏雪蕉再暮日上山

繫馬松楸下孤墳當我前
重泉無白日宿草倏三平
有德未能報撫心空自憐
徘徊攬雙涕山色暮蒼然

曉行

召代風雅卷之四

十四

旅人不遑寐晨起戴星行暗谷泉流響空林鬼火生
倦童睡且去班馬顧還鳴更物杈牙石山蹊苦未平

全羅右水營

節度轅門壯前臨碧海頭角聲吹浪轉兵氣雜雲浮
南徼元千里吾生偶一遊長歌拂雄劔獨上伏波樓

春日與道長同澄懷洪公重聖赴東湖之約馬

上口號

東城並遊轡湖上赴春期巖抱新陽早林開宿霧遲
眼青天際樹肩聳馬頭詩今日滄洲興惟應白鳥知

龍華寺

窈窕穿雲逕崎嶇渡壑橋僧殘有數衲寺古歷前朝
石室逢人少桃源與世遙勝緣吾不淺一宿度清宵

蠶谷

亂木深深峽孤煙寂寂村客來尋草逕翁出啓柴門
壑雨當簷落巖泉繞碓喧青蔬兼白飯猶見野情敦

安弘齡

遣懷
急節如流水浮生奈老何宦情隨病減歸興入秋多
唧唧蟲吟壁蕭蕭葉振柯飛騰向來意遲暮轉蹉跎

月下懷

張希棧

寂寞寒齋夜孤吟倚小扉竹涼侵道帙山氣入簾幃

不暇个風言卷之四
一五
破壁殘燈暗虛窗曉月微緬懷愁不寐松露滴蘿衣

渡海

林春養

孤舟浮瘴海端坐傲層濤遠樹春猶早危檣日正高
煙岑供望眼風沫灑寒袍白鷺驚飛去沙邊有釣曹

登宣川倚劔亭憶金將軍

應河

洪世泰

當日宣川守深河戰不歸大東臣獨有中國事全非
尺劔餘秋色孤城半落暉悲歌塞天濶倚馬看雲飛
過春谷靈几

始到疑猶在披帷不見人空床餘坐卧片木寄精神
親友時來哭妻孥獨守貧茂陵無使者遺草委箱塵

寄題李叅奉齋舍

松栢春陰裏 靈宮晝寂然地中那見日花外只聞
鷓厚德臣民泣徽音史冊傳美君齋沐室猶得守三
年

農巖金判書挽

屏居仍宿望朝野一宗師大失當時用終爲 聖主
思山河今氣盡天日後名垂俎豆應三世千秋石室
祠

又

濁世氛埃裏公能得久畱士林同一涕吾道欲誰謀

天迥空懸斗江虛有繫舟向來聞太極多恨失深求

又

天意蒼茫甚高賢命足悲侍終門下士迎拜地中兒
後卽旁孫弱生猶闔室飢滄江有白鳥畱汝守虛帷

又

尚憶公兄弟招余上峽遊有詩分四郡無日不東樓
往事登仙夢浮生淪世愁祇今龜島水嗚咽入三洲

哭東翁墓

不盡當時哭還携數子來相看一孤塚更勸此深杯
末路多論跡冥司或愛才樵歌亦腸斷似欲說君哀

送李士春之嶺北

去歲伏波幕今年出塞遊壯心歸白髮邊色土烏裘
驅馬關山道磨刀隴水流誰知萬里客初亦志封侯

滿月臺

故國青山在荒臺落日斜當時一統地殘郭幾人家
玉樹翻樵唱銅駝隱野花千年有衰柳夜夜怨啼鴉

大江

大江涵萬象天水混空清岸斷峰相對舟行樹欲迎
浮雲雨外黑落照浦西明白鳥何孤潔雙飛羽翮輕

題幸湖歸來亭

名

十七

栗里田園好歸來五柳存無人爭一壑盡室住孤村
山雨花垂逕江春水到門醉鄉天地大高枕老樗根
余未到沁也農巖與三淵用池字唱和爲余誦
輒敢攀和

初月松間出依然昔卧時山花纔半樹春水欲平池
撫跡誰非客偷歡却在茲有魚波底伏曾亦聽吾詩
題揔戎山亭

孤亭可舒嘯獨往有誰知片雨開千嶂長天到一池
坐聞鷺語近意與樹陰遲更喜轅門靜微風不動旗
晚吟

高天青悄悄仰視數鴻過日夕柴門靜山居秋葉多
村烟隱犬吠隣杵間樵歌歲暮涼風至其如芳杜何

雨夜述懷

柴門夕復掩默坐聽秋蟲獨樹溪聲外明燈雨色中
幽懷生靜夜浩氣激衰翁少小凌雲志高歌滿海東

金施普

澤齡 清涼別業

酒熟無人勸東風吹自香花將春意重日與午眠長
待雨催移稻穿雲遠採桑田家漸多事猶勝洛中忙

登樓

石萬載

客意何蕭瑟驚逢水國秋十年長在路千里獨登樓

野濶飛孤鳥江清點小舟憑欄多感慨世事入搔頭

新興寺

步入新興寺煙霞境自幽鶴巢樓外樹僧汲石間流
俗客來何晚山花笑不休重遊難可卜數日且淹留

武溪洞

步逐峰陰轉綠溪一道斜宿雲封斷壑新雨濯明沙
境淨游氛息林深晚籟多琴樽坐終夕有興入無何

旅懷次石洲韻

申纘遲

北塞秋將盡南歸計却非一封書未達千樹葉皆稀
霜月侵蓬牖涼風動竹扉羈魂逐歸鴈夜夜渡江飛

鎮南樓

在黔毛浦

洪世範

蕭蕭風雪裏獨上鎮南樓水冷魚龍蟄山昏鼓角愁
乾坤無定宅江海有孤舟歲暮仍為客悲吟欲白頭

思遊邊友人次唐詩韻

韓昌五

沈吟懷遠別惆悵久停杯一劔人將老深秋鴈獨來
陣雲邊日暗叢菊故園開遙想天涯月南望首幾回

曉發金浦

任璜

宿雲濕未霽行客猶蓑衣立馬青山出呼舟白鳥飛
斷橋樵路細疎樹水村依美爾荷鋤者世間無是非

店舍

白興銓

客欲朝餐過翁呼屋裏妻簷端雙乳燕籬下一鳴雞
裊裊炊煙細青青隴麥齊徑沽村酒飲隨意得詩題
初夏奉邀滄翁同遊清冷亭

北郭悲歌後東郊又此亭人無俗眼白詩得道峰青
天地雙蓬鬢園林一玉瓶陶然便忘返黃鳥盡情聽

九日

崔麟瑞

東籬秋景薄佳節病中催白酒誰家熟黃花昨夜開
空聞寒葉墜不見故人來獨坐還怊悵天邊一鴈回

八日積翠臺

崔世恒

地勢高而敞餘花獨此園莓苔承砌暗雲木護臺繁

怪鳥鳴侵席危峰翠壓樽村童認佳節向夕揭燈喧

山寺

朴東杞

輟棹登沙岸驅騃入磴蹊水村雞漸遠山閣月初低
暗谷風泉落寒林露鵲棲忽聞清磬響知已到招提

仙遊洞

安瑞台

聞說仙遊洞仙人舊日遊煙霞蔽翠壑花月暎丹丘
鶴去雲猶在山空水獨流風光如有意容我且淹留

武溪洞

金喜郁

杖策出西郭青山煙靄昏鍾聲來近寺樵唱起遙村
釀雨溪雲合鳴春谷鳥喧殘花猶在樹且可倒芳樽

昭代風謠卷之四

Blank lines for text in the right column.

昭代風謠卷之五

五言排律

端居

劉希慶

歲暮幽居趣盤松雪壓時携琴彈古調呵筆寫新詩
親友年年減筋骸日日疲看梅晨起早玩月夜眠遲
澗水連方沼山雲過短籬尊中浮綠蟻且莫負佳期
丁卯兵亂寓揚州村舍用杜詩傷春韻

崔奇男

北望龍輶遠西來虜騎多元戎一失律士卒盡韜戈
落日沉荒戍狂風捲大河野花憐白髮林鳥和悲歌

避寇隨飄梗移家憶綠蘿兵塵暗天地還恐礙冲和

次崔英叔題尹氏白麓幽居十韻 金孝一

洞匝仙壇邃巖聯大隱斜誅茅全地秘與世卽天涯
甃石開新井栽蘭薙雜花水聲哀玉碎山勢老龍拏
岸幘風圍局披蓑雨種茶松醪知己熟澗藪不須賒
謝事神仍泰談玄語不諱倘能分隙地終欲托隣家
寂寞元吾志蹉跎且歲華重來恐迷路題壁字如鴉

次王維感化寺韻

金忠烈

寶刹諸天近金繩覺路平雲端入靈塔樹杪出雕楹
萬壑飛嵐翠千巖落澗聲草舍甘露潤花雜絳霞明

晝永松門靜春深梵宇晴迥臨危磴上如在半空行
日月開龍界風煙接鳳城野蔬供綠筍山果摘朱櫻
鼎熟胡麻飯鑊香石髓羹願隨禪誦侶瀟灑送餘生

題金將軍

應河傳後

李得元

一讀將軍傳嗟嗟撫卷頻孤忠足驚世壯節獨超倫
回首當年事傷心戊午春天愁車嶺外日慘大河濱
勇義提殘卒輕身敵萬人存心除羯狗不願畫麒麟
白羽風生筈青龍血染鱗漢兵驅霹靂胡騎退紛繽
海岳咸崩蕩乾坤忽晦淪和戎羞魏絳罵賊慕張巡
百戰心難屈千秋憤未伸塞雲知厲鬼關月想精神

爵贈全遼伯恩光外國臣
琬珉碑已著丹牖廟猶新
尚起詞人筆終沾烈士巾
何由睹雄略南北掃妖塵
四友堂梅花將謝與主人
相對歎賞抽韻得蕭

字賦三十八韻

洪世泰

浩蕩江南地羅浮一夢遙
有生多水滢隨意或山椒
朱害依叢薄猶憐兔采樵
孤根移得早寸土寄還饒
大有中園色能爲衆木標
真疑自蓬島虛想下璇霄
飾閭才容入提餅日課澆
琴書宜作伴松竹合相要
十月乾坤閉千林雨雪濼
日行窮北陸春意返南條
蓓蕾舍中粹英華發外韶
頻窺候新萼不寐守殘宵

細着初停霰繁舒卽綴瑤
鴻門碎玉斗鮫室剪霜綃
皮盡溪苔蝕查餘野火燒
窻間大庾嶺簾外灞陵橋
擁腫形偏古蕭疎韻更超
精神寒後王顏貌瘦中嬌
素愛肌呈玉紅嫌頰暈潮
至人姑射卧游女漢臯邀
濁界披來潔煩襟對則消
薰深畏骨軟清極念腸枵
閉戶香猶洩回燈影乍搖
桃夭爭妬面柳弱只誇腰
勁節斯無比竒姿孰得描
暫衰欣續綻旣盛惜將凋
暗襲衣中透輕吹酒上漂
獻花要宋賦畱實待商調
和靖同生活離騷太寂寥
從教鶴子狎不許蝶媒驕
玉笛愁誰弄冰魂恨莫招
相看春脉脉獨立夜迢迢

背月鈿粧罷憑風縞袂飄難忘衛叔寶恐別董嬌嬈
淡色終非杏餘芳豈化蕭攀枝記昨日數朶減今朝
絕艷那能久幽愁不自聊翻同桑下戀欲去更長謔

四友堂席上疊前韻奉和諸公

夙昔嚶嚶志千秋不在遙修姱尚奇服芳潔愛申椒
蜀肆聞潛卜王官有老樵杜門甘已拙當局任他饒
蘗苦難爲味松高也作標孤懷耿宇宙浩氣塞雲霄
眼豈容塵眯胸須痛酒澆敢期當世具獨許數君要
歲暮山如睡天寒雪正漶灰吹至後氣梅破臘前條
曲室堪排凍衰顏暫借韶敲扉只越陌襍被或連宵

陰谷誰投黍冰池卽幻瑤檢書抽玉笈題畫出鮫綃
茶取龍團瀹香宜艾納燒呼醪郭北舍踏月水西橋
境入壺中秘神從象外超閒雲太較懶狎鳥漸生嬌
筆奮蒼龍劍詩驅白馬潮傍看諸子競直欲古人邀
漫興形骸放清吟鄙吝消律才回泰簇星已歷玄枵
地脉泉深洩春心柳暗搖風噓張谷口霧斂出峰腰
點綴園林匝分明水墨描形雖道與屈志不鬢俱凋
柳下居爲鍛淮陰飯有漂庖刀推妙解賈鐸許能調
此事真殊絕吾生未寂寥飢仍豹文變老亦驥蹄驕
畏壘夫何異濠梁只可招塵埃皆熒熒丘壑一迢迢

乙巳年... 卷之五
四
縱海脩鱗沛狎天逸羽飄專場嗤戲儼倚市耻呈嬈
短褐寧懷玉貧居且綿蕭舍情向菌閣杖策待花朝
喜得同心會留爲晚景聊尊前不盡意收拾入歌謠

安亨甫母氏挽詞

宗黨吾門少疎支視密親每憐孤後泣深庇厄中身
睦族推餘惠肥家本積仁情因令子篤禮各老孃均
請粟周時急升堂候日頻從三仰懿德望入祝長春
王雀俄看入丁藤竟不神緹麻猶限制賙衾只傷貧
尊屬皆凋喪殘生益苦辛昔見今白首臨挽憶先人
施普書齋同詠土爐

鍊質從挺埴雖微亦世需中虛能以智外樸欲爲愚
着處皆安土提時可反隅或嫌黃面老吾受赤心輸
正合三冬用寧容一日無乍噓煙颺白深撥火呈朱
凍酒朝熏得殘燈夜續須策功先彼鼎餘力及隣厨
既冷君休棄當炎衆所趨窮陰天地閉獨賴有茲爐
與諸子遊故宮二十二韻

太祖膺三統神都創法宮上闕雙闕迥旁列百司同
鳳沼銀河象龍樓紫極通君臣疑密勿民物囿亨豐
日月光華裏乾坤造化中世宗治莫盛宣廟德
仍崇運極箕封內戎生日域東干戈八路慘灰燼九

重空大國扶持力 先王克復功洪基元自固寶曆
遂無窮廢苑何寥落芳林尚鬱蔥守闔閭種菜遊者
或桴弓采艾還吾輩臨流並冠童西山方雨氣萬柳
共春風水弄浮新綠花慳放早紅坐移分藉草詩罷
仰歸鴻玉柱摩殘蘚金梁躡斷虹余生嗟叔季世道
感窳隆社稷天俱永城池地最雄重修後 聖后往
事泣衰翁洛誥書猶在簫韶曲未終醉歌爭落景蕭
瑟激危衷

蜘蛛

滿腹絲都是天生結網工潛抽先絡草大設即遮空

思密經營際機深布置中善緣欺蜥力能織奪蠶功
細漏簷間雨輕颺屋角風誤衝妨宿雀橫脊物飛蟲
白晝看來失黃昏觸處同居當四要害意欲一牢籠
毒喙從他賊饞腸得自充磨瘡何智識占喜或靈通
觀感憐公子知幾笑隱翁商王獨解祝至德永無窮

昭代風謠卷之五

